

# QUÆSTIO MEDICA.

*Cardinalitiis disputationibus manè discutienda in Scholis Medicorum,  
die Jovis vigesimo secundo Februarii 1714.*

M. LUDOVICO POIRIER, Doctore Medico, Sre-  
nissimi Delphini Medico Primario, Præside.

*An ad tuendam senum, quàm juvenum sanitatem potiores Vena  
sectio atque Purgatio?*

## I.

**A**RTEM medendi nobilissimam, qui naviter excolere cupit, præsentì servandæ hominum sanitati non minùs invigilet, quàm morbos illorum vitæ periculosiùs insidiantes aptè curare suscipiat. Hæc, quam nostratum aliquot ad centum & ultrà pervenire non rarò refertur annorum numerum, variis quoque distingui solet ætatum nominibus ac intervallis. Nunquam diutiùs salubriùsve sustinetur, quàm libero faciliq; sanguinis circuitu. Ad tam mirandum indefinentemque (dum stat homo, attendendo motum) ni stupeas omnino; saltem scrutare sedulò, per quos agitur, innumeros ferè vasorum, glandularum-ve, corporis humani fabricationem ubique contextentium, gyros & anfractus. Penitiùs adhuc, si rei notitiam prosequare, vix credes, qualis & quanta sit harum vel exilissimarum naturæ machinarum vis elastica. Neque tamen propterea longè potentior cordis minutiùs aut scrupulosiùs velis examinare. Sed, heu! quæ maximè vigent in juvenibus, nervorum, membranarum, musculorum, arteriarum, venarum firmitas & robur fibrillarum, ex qui-

bus cæterarum partium compages exurgit organica, dum tacito temporum lapsu senescimus, ipsæ laxiores ac debiliores evadunt.

## II.

**T**AMDIU sani vivimus, quamdiù recta succedit nutritio. Quocumque paratos modo solidos mensæ jubeas apponi cibos, in ore sufficienter mandi necessum. Sic multâ diluti salivâ, quæ promptiorem horum promover dissolutionem, tum linguæ, tum circumpositorum muscutorum, nec non œsophagi motu, ventriculi fundum petunt. Hoc uno, molæ vim, quâ triticum conteritur, æmulante, qui dixerit alimenta in chylum converti; causam quidem efficacissimam: sed alias non parùm valentes prætermittens, attulerit. Liquor ille dulcis & albus, hordei cremori non absimilis, ab intestinis per tubulos sibi destinatos, ad cor usque conscendit. Sanguini commixtus variis itibus redivisusque per arterias & venas, illius tandem naturam induit, aptissimus alendo; modò tamen ubique suis reliquiis inutilibus atque superfluis benè repurgetur, foràs ejiciendis: non aliter enim sanitatis & vitæ longinquitas sperari poterit aut expectari; quin viscera niteant nec ullibi in horum recessibus, vasisque circumjacentibus & aliis majoribus restagnet sanguis; neque, quod pejus est, acescentes torpescant humores atque nidulentur.

## III.

**Æ**TATE juvenili, quæ tantoperè deberet ab omnibus æstima-  
ri, nemo ferè non abutitur, quibus pollet, viribus nimium confusus. In utroque sexu fervidior atque spiritibus turgens sanguis nullum non movet cordis affectum, pietatis sensu vel voluntatis arbitrio difficillimè componendum. Tunc etiam, quotquot sunt corporis universi functiones perficiuntur alacrius; alimentorum coctio; chyli defœccatio; variorum, quibus primùm inquinatur sanguis, excrementorum, bilis in hepate, serosi humoris in renibus, ejusdem pluribus intus in glandulis, extus per patentiores atque flexiliores cutis poros multò copiosior secretio. His omnibus sanitatis atque vitæ commodis gaudent reverà juvenes ob validiores atque robustiores singularum partium fibras; unde sanguis magis attenuatus puriorque per vasa circumfertur hinc & inde liberius, in cerebro cribrantur uberiores cuduntur ve spiritus animales, nervosum, membranosum, tandemque musculosum omne genus ita moventes atque sti-

mulantes, ut cuius exercitationum speciei se præbeat ultrò juvenis. Non sic à senibus naturæ munia perbellè geruntur; quos enim longa series annorum vel artibus ac disciplinis, vel rerum multiplicium usu & experientiâ magis exornavit aut illustravit; hanc eandem corpora eorum non mediocriter debilitavisse certissimum.

## IV.

**Q**UEMADMODUM nimio gemens sub pondere cymba, mari vel fluvio innatans tardius moveri videtur: ita non existimabitur ineptè, senum sanguinis molem, eâ, quæ juvenum vasis contenta propellitur, crassiores pigriores-ve lentius agi, scilicet in illis adhuc imminutâ præsertim cordis ipsius nec-non quarumcumque fibrarum motricium elasticitate. Edax rerum tempus duriora conterit; quicquid vitæ vel lucis usurâ fruitur, sensim sine sensu debilitatem contrahit, donec tandem communi lege vel fato pereat ineluctabili. Regum turres pauperumque tabernas mors æquo pulsât pede: sed inter omnes qui provectiorem attigerint ætatem; paucorum viridis, multorum sæpius ærumnosior ac infirmitatibus plenissima senectus: has anevertere, vel valetudinis integritati prospicere, cum tui muneri vices postulant; id potissimè curabis, ut quantum prudentiori vel usitatori tibi licebit assequi conjecturâ, solidorum atque liquidorum corporis inter se reciproca servetur ponderis & motus æqualitas. Symmetriam vel æquilibrium nuncupare placet; utrimque juxta mentis humanæ captum rectè decernis; ulterius autem vel curiosius inquirendo; cave ne multa garriens gravius allucineris. Indicationi Medicæ potiùs satisfeceris (ut senum sanitatem tuearis) si rariùs Venæ sectione, frequentius verò purgatione, quicquid his vel copiâ vel qualitate nocere posset, à quo morbi plures imminerent, cautissimè vel securissimè detrahas & educere coneris.

## V.

**N**ON sine quodam saltem rationis momento definivit Hippocrates Medicinam detractione redundantium & adjectione deficientium. Sicut enim assumptorum alimentorum ope vita protrahitur: ita præsertim hæc cum sanitate senum diutissimè servatur Venæ sectione, vel purgatione ritè administratis; quæ tunc vix unquam, aut saltem multò minùs necessariæ juvenibus: hos humorum sarcinâ, si quæ succrescat, levat undique natura, sive per manifestas corporis

vias, five per insensiles ejus habitûs : sed in illis moram trahentes, quot invelherent mala, ni præcipuis artis nostræ præsiidiis longius amoverentur ; crudiore chylo ferè fatisceret ventriculus : non satis elaborato sanguine viscerum infimorum glandulæ contumacioribus infarctibus fierent obnoxia ; ruber ille latex pulmonum vesiculas difficillimè trajiceret, aëri commiscendus : neque propterea, iteratis roties cordis pulsationum ictibus, vel arteriarum se magis ac magis offerret subigendum. Denique nec purior, nec tenuior neque subtilior ad cerebrum impelleretur, in spirituum animalium formam immutandus. Inde nervi flaccescerent aut conciderent ; vires languerent omnes spissiori sanguine velut obruta ; quas evolvere vel in libertatem quasi restituere licet atque datum est, modò certam quamdam subripias oneris partem, intûs adeo conclusam, ut minima solum per angustiores aridioris senum cutis poros valeat exhalare, sanitatis insigni dispendio ; tanta scilicet singulis diebus tenuioris substantiæ copia per corporis habitum in auras abire solet, si Sanctorio debita fides non denegetur. Hujus insensilis, non secûs ac aliarum in senibus vacuationum naturalium errores aut defectum, ad eorum valedudinem servandam, supplebit optimè Venæ sectionis interdum, sæpius purgationis repetitus usus.

*Igitur ad tuendam senum, quàm juvenum sanitatem potiores Venæ  
sectio atque Purgatio.*

Proponebat Parisiis FRANCISCUS-ANTONIUS LE DRAN, Parisinus, Baccalaureus Medicus. A. R. S. H. 1714.

---

Typis JACOBI QUILLAV, Universitatis, & Facultatis Medicinæ  
Typographi,